

AGENDRE TRINITATIS

MINGGU 20 SEPTEMBER 2026

1. FANGOWAI BA FOGAONI

(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).

- Fangowai** :
SA : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.
SATO : Ya'ahowu !
SA : Ya faofao khömi Lowalangi...
SATO : Ya fao Khöu Geheha-Nia
Fogaoni :
SA : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 27**

27. YEHOWA WA' ABÖLÖGU 1

do = f 4/4

MM = 88 - 92

1. Yehowa wa' abölögu, me Lowalangi Ia.
 No Ihonogö dödögu, ba lumö danga-Nia.
 Ha Ya' ia nisunogu götö wa ' anau nosogu.
 Halleluya khö-Nia.
2. Yehowa wa' abölögu, me umbu wa' omasi.
 Ibe' e khögu Zangefa, Yesu si möi salahì.
 Da' ö zomuso dödögu, fa' ebua dödö-Nia,
 usuno Lowalangi.

2. FANGA'ARO'Ö WA'OWULO (VOTUM)

- SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):
 No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

SATO : YADUHU

- SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gahe ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. HALELUYA.....

SA : **Manunö** : BZ. : 452

Halleluya..... Halleluya..... Halleluya.....

SA : Mangandrö ita :

He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö bangawalö gabula dödö, tundreheni faböi alau ndra'aga. Fatöröga ba zomasi Ndra'ugö irugi gamozua, fa makhamö nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. **(Mudadao zato)**

3. MANUNÖ moroi ba Mbuku Zinunö Numero 236

236. RONGO WANGANDRÖ DÖDÖGU 1

do = g 4/4

MM = 88 - 96

1. Rongo wangandrö dödögu, So ' aya Yesu.
He göi ira talifusö si no banua-U
Yesu, Yesu, rongo we' aogu.
He fe ' ao ndra talifusö, si no banua-U.
2. He Yesu sahakhö tödö, möido föna-Mö.
Usao' ö ngawalö horö, Ösasai do-Mö.
Reff: Yesu, Yesu, rongo we' aogu....

4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **Yona 4:1-11**

1. Ba abao sibai dödö Yona, mofönu ia.
2. Ba mangandrö ia khö Yehowa, imane: He Yehowa, ya'ia da'ö niwa'ögu, me sodo ba khöma na, ba da'ö mbörö woloigu, me usawa Darisi ena'ö, fa böi si manö! Noa sa aboto ba dödögu, wa no Lowalangi sebua tödö ba sahakhö tödö ndra'ugö, si lö aliolio mofönu ba si no fahöna fa'asökhi dödö, awö wa aröuröu ba dödöu dania wamakiko andrö [niwa'öu]!
3. Ba etu'ö manö sa'ae nosogu, ya'ugö Yehowa, sökhi sa na matedo, moroi na aurido!
4. Ba imane Yehowa: Hadia, si ndruhu, so mbörö wönumö andrö?
5. Ba iheta ia yomo ba mbanua Yona, tou mbanua i'ia, tano ba gatumbukha lu. Iau nose khönia ba da'ö, ba mudadao ia baose andrö, ba lumö, ba wamaigi hadia nifatörö [Yehowa] ba mbanua andrö.
6. Ba ifatumbu'ö lafandru Yehowa, Lowalangi; manöi, yawa Yona, ena'ö telumö högönia, ba ena'ö döhö walösökhisökhi dödönia; ba omuso sibai dödö Yona lafandru andrö.
7. Ba me moluo, me mahemolu ö, ba i'asogö gukuö Lowalangi, sanögi töla lafandru, ba aleu.
8. Ba me tumbu lu, ba ifatörö nangi timu, angi lökhö, Lowalangi, ba ihandro högö Yona sino, ba atata sibai dölania. Ba omasi ia mate, imane: Sökhi na matedo, moroi na aurido!
9. Ba imane Lowalangi khö Yona: Hadia, si ndruhu, so mbörö wönumö, ba lafandru andrö? Ba imane: Tenga si lö börö, na mofönu ndra'odo, irugi wa'amategu!
10. Ba imane Yehowa: Ya'ugö, ba no sahakhö tödö lafandru andrö, si lö erege dödöu ba si tenga ni'e'ebuamö; ha sara wongi wanöinia ba ha sara wongi göi wa'amatenia.
11. Ba ya'odo, ba hadia, ba lö uhakhösi tödö Niniwe andrö, banua sebua, si no töra 120,000 nono niha, si lö mangila hezo gambölö, ba hezo gaberä, awö gurifö niha, soya sibai?

Simanö daroma Li Lowalangi, da tatema'ö faoma sinunö: BZ.Numero 20:1

BZ. No: 20. MISUNOSUNO ZO'AYA

1. Misunosuno Zo 'aya, mi bè zumange-Nia.
Mi 'ebua ' ö döi-Nia, sotöi banua-Nia.
Me no Ikaoni göi ami, afu mitemawa'au ri, khö Yesu, Sangorifi.

5. FANGANDRÖ FANGEFA HORÖ

SA

: Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita,

awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

Mangandrö ita :

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna höröma si no mafalua i'otarai iraono ndra'aga, he ba wehedema, era'era dödöma, awö gamuatama si lö faudu ba daroma Li-Mö. Andrö möiga khö-U ba wangandrö fa'ahakhö dödö-U, ena'ö Ö'efa'ö khöma höröma andrö si no mafalua, irege sohahau tödö ndra'aga wanohugö fekolima ba zi so fönama si faudu ba zomasi Ndra'ugö. Hakhösi dödö-U khöma Ama, ba be'e aefa khöma höröma andrö ma'afefu, Yaduhu.

SATO : Manunö : BZ. Numero 224 : 1

224. NA'UBINI'Ö HORÖGU KHÖ YESU

1. Na'ubini'ö horögu khö Yesu, ba lö usöndra za hono dödögu U'ombakha'ö ngawalö horögu, mo lala dödö.

SA : **Turia Wangefa horö** : “Utayaigö golalöwamö, si mane lawuo, awö horöu, si mane sau. Tema fuli'ö khö-Gu, me no U'orifi ndra'ugö. LAKHÖMI KHÖ LOWALANGI SI YAWA.....

SATO : Manunö:

450. BA FA'ATULÖ BA GULIDANÖ

1. Ba fa 'a tulö ba gulidanö ba niha ni'omasi 'ö andrö **(mudadao zato)**

6. FOMBASO TAROMA LI LOWALANGI FÖNA HUHÜO (AB)

: Da tafondrondrongo daroma Li Lowalangi, tehalö moroi ba zura **Halöwö Zinenge 17:10-15**

- 10.Ba la'anema'ö talifusö, lafofanö ba Mberoia ndra Faulo Sila, ba zi bongi; ba me larugi, ba möi ira ba zekola niha Yehuda.
- 11.Ba si sōkhi tödö da'ö, moroi ba zi so ba Desalonika, omasi ira lafondrondrongo daroma li, ero ma'ökhö la'alu'alui ba zura, na si ndruhu.
- 12.Ba ato ba khöra zamati, ato göi ma'ifu zalawa Ndrawa Heleni, ira alawe ba ira matua.
- 13.Ba me larongo niha Yehuda, ba Desalonika, wa ba Mberoia göi i'ombakha'ö li Lowalangi Faulo, ba möi ira, lafawukaisi dödö zato ba da'ö göi, lafakuyu.
- 14.Ba la'anema'ö lafofanö Waulo talifusö, ena'ö isawa mbewe nasi; ba toröi furi ba da'ö Zila ba Timoteo.
- 15.Ba lafasao Waulo awönia, irugi Natena, ba i'oroi'ö khöra, lawa'ö khö ndra Sila Timoteo, ena'ö lata'ita'i, we'amöi khönia, ba mofanö ira.

Ya'ahowu zamondrongo taroma li Lowalangi ba same'e ba dödö.

SA+SATO : Yaduhu

8. FASÖMBATA

SA : Iada'e tebe'e khöda ginötö ba wolohe fasömbata khö Lowalangi. Ta'osamuzaigö wame'e, he fasömbata si föföna, ba simanö göi zi mendrua awö zi medölu, sifao famasao fasömbata sanandrösa ba zigöna Bencana Alam bo pulau Flores (NTT). Ba si föföna ua da tafondrondrongo Li Lowalangi me imane:
❖ Same'e sumange fangandrö saohagölö, da'ö zamolakhömi Ya'odo, ba zi lö

sinegu ba mbuabuania U’oroma’ö wangorifi andrö khö Lowalangi.

SA : Tafa’ema wasömbata khö Lowalangi, manunö ita moroi ba Mbuku Zinunö
Numero 401

401. KHÖU YESU U’ ANDRÖ TOLO 1

do = f 4/4

MM = 88 – 96

- 1. Khö-U Yesu u ’ andrö tolo sangorifi Ndra’ ugö.
Ae orifi göi ndra ’ odo me höligu Ndra’ ugö.
No fahöna zagafökhö wanörö ulidanö.
Ha Ya ’ ugö dötönafo samè fondrara dödö.
- 2. No u’ eregesi tödö, wanöröi ulidanö.
Wangalui sahono dödö si lö tebulöbulö.
Lö manö si falukhado, ha fangerege dödö.
Ha sorugo dötönafo naha sahono dödö.
- 3. He So’ aya böi bulö’ ö khögu daroma li-Mö
Ufonaha ba dödögu me no haregu da’ ö.
Ba da’ ö sa manandrösa wanötöna dödögu.
Lö moguna danöbö’ ö ha limö nifatigu.

Na no awai la’owuloi/lafa’ema wasömbata, ba owulo tanö furi zangowuloi Fasömbata, lafendrongagö wolohe föna fasömbata, ba la’o’ö gofanöwa note zinunö (irama lagu).Fatua lö möi ira wolohe föna, ba imane Sangai Agendre:)
“Da tafasao wasömbatada andre föna Lowalangi,.....Muzizio ita fefu.....
Manunö ita moroi ba Mbuku Zinunö numero 261

261. YA’E ZUMANGE 1

Ira’alawe□

- 1. Ya ’ e zumange fasömbata, ma ’ ohe sumange Yehowa.
Iramatua
Reff :Ma’andrö khö-U fahowu’ö zumange ni ’ohema khö-Mö
- 2. Ya’e zumange fasömbata mabe’e soroi ba dödöma.
Reff : Ma’andrö khö-U
- 3. Ya’e zumange fasömbata buala si’otarai Nama.
Reff : Ma’andrö khö-U
- 4. Ya’e zumange fasömbata, boto, noso, ba fa’aurima
Reff : Ma’andrö khö-U
- 5. Ya’e zumange fasömbata, lö irugi zomasi dödö-U.
Reff : Ma’andrö khö-U
- 6. Ya’e zumange fasömbata, ma’aohasi gölö Zo’aya.
Reff : Ma’andrö khö-U

FANGANDRÖ : *(Fangandrö nidönia’ö fasamösa zangowuloi fasömbata, aefa da’ö ba lafa’ema ba Danga zangai huhuo, itema’ö sangai huhuo awena itou’ö ba dete meza. Ba na so Wasömbata si sambua ni’ofulu, owasa wanaru ma owasavwamasi, btn ba itema’ö sangai huhuo si fao taroma Li Lowalangi si faudu ba wasömbata ni’ owuloi andrö)*

8. KOOR/VOKAL GROUP

SA : Da tafaogö dödöda ba wanuno Lowalangi faoma sinunö ni’olohesi:
Koor ba Vokal Group
a. Koor Jemaat Tuwuna
b. Kegiatan Komisi Koremda
c. Kegiatan sektor 3
d.

9. MANUNÖ

SA : Da tafa'anö dödöda wamondrondrongo taroma Li Lowalangi, manunö ita moroi

Ba Mbuku Zinunö **numero 163**

163. UHONOGÖ SIBAI DÖDÖGU

1. Uhonogö sibai dödögu ba wamondrondrongo li Mö Yesu Mangalulu ndra'odo föna-U ba gametahö-Mö ia da 'a Öbayoini Eheha-U Yesu dozigö mbanua samati khö-U. Ubokai dödögu khö-U Yesu nahia daroma li-U. Taroma li-Mö lö fa'atebulö menewi ma 'ökhö ba si 'ogötö'ö lö sa mamalö. Taroma li-Mö si möi fangabölö utema 'ö soroi ba dödö, tolo ba wolo'ö.

10. HUHUAO SEBUA

- SH** : Ya'irorogö dödömi, awö gera'erami fa'ohahau dödö andrö, khö Lowalangi, Sabölö moroi ba gera'era niha fefu, ba khö Keriso Yesu. Mangandrö ita.....Yaduhu.
- a. Fombaso taroma Li Lowalangi *Filifi / Pilipi 4:10-19 (Tuho Migu: (Utaögö Manö Fefu, Börö Zo'aya Sangabölö'ö Ya'o / Segala Perkara Dapat Kutanggung di Dalam Tuhan)*
 - b. Fanuriaigö
 - c. Nitano ba dödö. *Filifi / Filipi 4:13 (Ulaw manö fefu, börö zangabölö'ö ya'o andrö. / Segala perkara dapat kutanggung di dalam Dia yang memberi kekuatan kepadaku.)*
 - d. Fangandrö Fanga'aro'ö huhuo

SATO : Manunö : BZ. Numero 154 : 1

154. NO MAFONDRONDRONGO LIU ²

1. No mafondrondrongo li-U, Lowalangi So ' aya. Tanö ba dödöma ia, fa böi olifuga. Fahowu 'ö ia khöma, ena ' ö ohahau dödöma fefu. Heta ba dödö zi lö sökhi, ma'o ' ö niwa 'ö-U.

11. TUHO WAMATI

- SA** : Me no tarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida
- SA+SATO** : ❖ Ya'o mamati khö Lowalangi Ama si lö ambö fa'abölö, somböi banua si yawa awö danö.
- ❖ Ya'o mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.
- ❖ Ya'o mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

12. ANGOMBAKHATA BA MBANUA NIHA KERISO

13. SA : Da tafondrondrongo gangombakhata:.....

14. MANUNÖ

SA : Manunö ita moroi ba Mbuku Zinunö **numero: 330 ayati 1-2**

330. BA NGAWALÖ WANANDRAIGÖ 1

do = f, 4/4
MM = 96 - 104

1. Ba ngawalö wanandraigö Yesu we 'ewe' e dödö.
He dumögö gulidanö so Zo 'aya sondrorogö.
Ha So 'aya gowe si lö tebulö, lö tebulö, lö tebulö.
Ha So 'aya gowe si lö tebulö sawatö sahono dödö.
2. He si bongi si ma' ökhö Yesu we'ewe' e dödö.
Oi taya wa' ata' umö me So' aya Zondrorogö.
Reff: Ha So' aya gowe si lö tebulö,

15. FANGANDRÖ SALAHI + FAMATENGGE + HOWUHOWU

SH : Muzizio ita fefu, mangandrö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

SH + SATO : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

SH : FAMATENGGE + HOWUHOWU :
Mi'angawuli si fao fa'ohahau dödö, ya tobali ami sura Keriso, samaduhu'ö Ya'la ba Lala wa'aurimi sero ma'ökhö, ba mitema (tatema) howuhowu Lowalangi :
❖ Ya mufahowu'ö ami/ita Lowalangi, Ya murorogö ami/ita
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/khöda
❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

SATO : Manunö BZ.Numero 330 ayati 3

330. BA NGAWALÖ WANANDRAIGÖ 1

do = f, 4/4
MM = 96 - 104

3. He tohare wanandraigö Yesu we'ewe' e dödö.
Lö khöda fangiwa dödö me So' aya zondrorogö.
Reff: Ha So' aya gowe si lö tebulö,

SH : YA'AHOWU

SATO : YA'AHOWU